

**Broj: UP1-06-13-1-199-2/23**  
**Mostar, 21.11.2023. godine**

Na osnovu člana 19. stav (1) Zakona o električnoj energiji Federacije Bosne i Hercegovine („Službene novine Federacije BiH“ broj 60/23), člana 18., člana 40. stav (1) i člana 43. stav (2) Pravilnika za izdavanje dozvola („Službene novine Federacije BiH“ broj 2/17, 39/20, 82/21 i 1/23), člana 11. stav (3) i člana 13. stav (2) Pravilnika o sticanju statusa kvalifikovanog proizvođača električne energije („Službene novine Federacije BiH“ broj 53/14), člana 4., člana 5. i člana 8. Pravilnika o metodologiji i načinu obračuna regulatornih naknada za imaoce dozvola - Prečišćeni tekst („Službene novine Federacije BiH“ broj 94/19 i 1/23), postupajući po Zahtjevu za izmjenu i dopunu dozvole za obavljanje djelatnosti proizvodnje električne energije broj UP1-06-13-1-199-1/23 od 13.10.2023. godine podnosioca zahtjeva JP „Elektroprivreda HZ HB“ d.d. Mostar, Ulica kralja Petra Krešimira IV broj: 6-A, Mostar, zastupanog po zakonskom zastupniku Dragi Bagi, u postupku izmjene i dopune Dozvole za rad za proizvodnju električne energije broj UP1-06-13-1-79-1/22, Regulatorna komisija za energiju u Federaciji Bosne i Hercegovine – FERK je 21.11.2023. godine na XXVI redovnoj sjednici donijela sljedeće

### **R J E Š E N J E**

1. Dozvola za rad za proizvodnju električne energije broj UP1-06-13-1-79-1/22 izdata Rješenjem broj UP1-06-13-1-79-15/22 od 13.12.2022. godine, te izmijenjena i dopunjena Rješenjem broj UP1-06-13-1-16-4/23 od 23.2.2023. godine i Rješenjem broj UP1-06-13-1-95-2/23 od 15.6.2023. godine imaoce dozvole JP „Elektroprivreda HZ HB“ d.d. Mostar mijenja se i dopunjuje, te glasi kao u prilogu koji je sastavni dio ovog rješenja.
2. Utvrđuje se JP „Elektroprivreda HZ HB“ d.d. Mostar, status kvalifikovanog proizvođača u objektu hidroelektrane „Mostarsko blato“, u periodu važenja dozvole iz tačke 3. ovog rješenja.
3. Dozvola za obavljanje djelatnosti proizvodnje električne energije iz tačke 1. ovog rješenja važi do 31.12.2038. godine, sa uslovima dozvole koji čine njen sastavni dio.
4. Sastavni dio ovog rješenja čini dozvola iz tačaka 1. i 3. ovog rješenja.
5. Imalac dozvole je obavezan plaćati regulatornu naknadu u periodu važenja dozvole na način i u iznosu koji utvrdi FERK posebnom odlukom.
6. Ovo rješenje je konačno, te se objavljuje na službenoj internet stranici FERK-a.

### **O b r a z l o ž e n j e**

Članom 11. Pravilnika o sticanju statusa kvalifikovanog proizvođača električne energije propisano je da podnosilac zahtjeva za sticanje statusa kvalifikovanog proizvođača električne energije, može biti i imalac FERK-ove dozvole za rad za proizvodnju električne energije, koji nakon dobivanja FERK-ove dozvole za rad ostvari posebne uslove propisane tim pravilnikom, ili koji odluči tek nakon dobivanja dozvole za rad podnijeti zahtjev za sticanje statusa kvalifikovanog proizvođača. Propisano je i da se u tom slučaju, zahtjev za sticanje statusa kvalifikovanog proizvođača podnosi na odgovarajućem obrascu kao sastavni dio zahtjeva za izmjenu i dopunu dozvole za rad za proizvodnju električne energije i postupak po istom se provodi kao postupak izmjene i dopune dozvole za rad, kao i da se status kvalifikovanog proizvođača, stiče na osnovu rješenja o izmjeni i dopuni dozvole za rad, koje donosi FERK, po okončanju postupka izmjene i

dopune dozvole za rad za proizvodnju električne energije, u okviru kojeg se razmatraju činjenice i dokazi relevantni za odlučivanje o tom statusu. Sa tim u vezi, članom 13. istog pravilnika propisano je da se u dozvoli za rad za proizvodnju električne energije propisuju uslovi koji se odnose na status kvalifikovanog proizvođača, te da je sastavni dio dozvole za rad za proizvodnju električne energije i poseban obrazac o statusu kvalifikovanog proizvođača.

Na osnovu navedenog, FERK je 13.10.2023. godine od podnosioca JP „Elektroprivreda HZ HB“ d.d. Mostar pod brojem UP1-06-13-1-199-1/23 zaprimio Zahtjev za izmjenu i dopunu dozvole za obavljanje djelatnosti proizvodnje električne energije, u postupku izmjene i dopune Dozvole za rad za proizvodnju električne energije broj UP1-06-13-1-79-1/22, radi sticanja statusa kvalifikovanog proizvođača električne energije u objektu hidroelektrane „Mostarsko blato“.

Prilikom pregleda potpunosti podnesenog zahtjeva, u skladu sa članom 9. Pravilnika o javnim raspravama i rješavanju zahtjeva, sporova i žalbi, FERK je utvrdio da je podneseni zahtjev potpun u smislu člana 12. Pravilnika za izdavanje dozvola.

S obzirom na to da su uz zahtjev za izmjenu i dopunu dozvole za obavljanje djelatnosti proizvodnje električne energije navedene činjenice i podneseni dokazi na osnovu kojih se može utvrditi stanje stvari, a na osnovu kojih je jasno da podnosilac zahtjeva ispunjava kriterije iz člana 18. Zakona o električnoj energiji Federacije Bosne i Hercegovine, odnosno iz člana 25. Pravilnika za izdavanje dozvola, FERK je utvrdio da su ispunjeni uslovi za primjenu odredbe člana 43. stav (2) ovog pravilnika.

Dalje, članom 4. i članom 5. Pravilnika o metodologiji i načinu obračuna regulatornih naknada za imaoce dozvola – Prečišćeni tekst propisana je dinamika i način obračuna regulatorne naknade za imaoce dozvola za obavljanje elektroprivrednih djelatnosti. Članom 8. istog pravilnika propisan je način utvrđivanja regulatornih naknada za imaoce dozvola za obavljanje elektroprivrednih djelatnosti. O obavezi plaćanja regulatorne naknade imaoцу dozvole se ispostavlja posebno obavještenje.

Na osnovu obrade Zahtjeva za izmjenu i dopunu dozvole za obavljanje djelatnosti proizvodnje električne energije podnosioca JP „Elektroprivreda HZ HB“ d.d. Mostar i dokumentacije priložene uz zahtjev, izvršena je izmjena i dopuna Dozvole za rad za proizvodnju električne energije UP1-06-13-1-79-1/22, radi sticanja statusa kvalifikovanog proizvođača električne energije u objektu hidroelektrane „Mostarsko blato“. Uz navedeno, FERK je uočio i potrebu usklađivanja uslova predmetne dozvole sa odredbama Zakona o električnoj energiji Federacije Bosne i Hercegovine, a sve u skladu sa odredbom člana 168. stav (2) tog zakona. Uvažavajući sve naprijed navedene razloge, predmetna dozvola za rad je izmijenjena i dopunjena u skladu sa zahtjevom podnosioca, te je usklađena sa odredbama naprijed navedenog Zakona o električnoj energiji Federacije Bosne i Hercegovine, sa tim da je period važenja dozvole ostao nepromijenjen. Postavljeni uslovi, u skladu sa članom 26. i članom 27. Pravilnika za izdavanje dozvola i članom 13. stav (1) Pravilnika o sticanju statusa kvalifikovanog proizvođača električne energije, stvaraju obavezu JP „Elektroprivreda HZ HB“ d.d. Mostar da u rokovima propisanim u uslovima dozvole za obavljanje djelatnosti proizvodnje električne energije iste ispuni, u cilju zadovoljenja propisanih kriterija.

Na osnovu navedenog, odlučeno je kao u dispozitivu ovog rješenja.

#### **POUKA O PRAVNOM LIJEKU:**

Protiv ovog rješenja podnosilac zahtjeva može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja. Tužba se

predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

**v.d. PREDSEDavajućEG FERK-a**  
**Jasmin Bešo, s.r.**